

Zeitschrift: Annalas da la Societad Retorumantscha

Herausgeber: Societad Retorumantscha

Band: 125 (2012)

Artikel: Italianissem s'ella Chianzun dalla guerra dagl Chiaste da Müs da Gian Travers

Autor: Liver, Ricarda

DOI: <https://doi.org/10.5169/seals-323577>

Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

Download PDF: 22.08.2025

ETH-Bibliothek Zürich, E-Periodica, <https://www.e-periodica.ch>

Italianissemss ella *Chianzun dalla guerra* dagl Chiaste da Müs da Gian Travers

Ricarda Liver

Ils italianissemss el romontsch dall'Engiadina ein in tema el 17^{avel}/18^{avel} tschentaner (Bibla da Scuol, Frizzoni)¹, lu puspei el 20^{avel} tschentaner cun Melcher, Lanel e Pult². All'entschatta dalla litteratura ladina el 16^{avel} tschentaner giogan ils italianissemss ina rolla pli mudesta. Ei croda denton en egl che Travers, cunzun en siu epos davart l'uiara da Müsch, drova pli biars italianissemss ch'auters auturs da siu temps, per exempl Bifrun e Chiampel. Quei ei buca da smarvigliar sch'ins fa endamen la biografia da Travers³.

El ch'ei staus guovernatur en Valtlina da 1523 tochen 1527 sto haver giu in contact intensiv cul talian. Ei secapescha ch'el dominava sez quei lungatg e duvrava el en siu mintgadi.

Plirs dils italianissemss ella *Chianzun da Müs* fan part dalla terminologia politica e guerrila. Els stattan pia en connex direct cul tema dalla *Chianzun*.

Travers drova il verb *praticher* che significhescha ozildi «ausüben, praktizieren» en ina muntada tecnic-politica che corrispunda al talian *praticare* «trattare, negoziare»:

Al Raig d'Francia in las lias havet prattichio
Da der guerra alg Milanais Düchiô (9-10)⁴.

Il verb ei d'anflar aunc ina gada encunter la fin della *Chianzun*, en in diever sintactic different:

Per que ls' Grischuns fün apruvôs,
Et tres alg Zettera prattichiôs,
Pesch d'fer cun lg' Castellan da Müs (681-83).

¹ Cf. BEZZOLA 1979:266.

² Cf. GRÜNERT 2005:80ss.

³ Cf. WIESER 1970.

⁴ Nus citein tenor l'edizion critica SCHORTA/GANTENBEIN 1942. La muntada da *prattichier* corrispunda al talian *praticare* ellas significaziuns 12 e 21 tier BATTAGLIA 14:19 («discutere, trattare, negoziare»).

Ina translaziun savess esser: «Perquei vegnevan ils Grischuns acceptai (sco partenaris da tractaziun)⁵ e contactai dil Z. (cull'intenziun) da far pasch cun il Castellan da Müsch».

Praticher en quei senn ei plitost surprendent. Ei fa endamen il fr. *pratiquer* qn «fréquenter, être en relation avec», tal. *praticare* «conversare, aver commercio, famigliarità, frequentare». Pli datier dalla muntada da *praticher* en quei liug ei denton la significaziun indicada da BATTAGLIA sut *praticare* 12. (14:19): «agire su qualcuno allo scopo di ottenere qualcosa; coinvolgere, impegnare, contattare».

Medemamein el context dall'uiara s'auda il verb *assuder* che corrispunda al talian *assoldare* «prendere a soldo»⁶:

Unna cumpagnia d'Neapolitans ch'el (scil. l'Cunt Girard) assudet
Et traunter sia glieud maschdet (185-86).

Quei citat ei il sulet exemplu egl artechel *assuder* egl emprem volum dil *DRG* (1:482)⁷. Las variantas *aspattet* e *asindet* els manuscrets C e D muosan ch'il verb era buca pli currents el 18^{avel} tschentaner. BEZZOLA/TÖNJA-CHEN 1976 dattan sut *Sold* in verb *assoldar* sco sinonim da *tour/piglier* in *servezzan*; ina tala fuorma ei denton buca d'anflar en *DRG* 1!

V. 279 *presidi* ei probabel in emprest dil talian *presidio* el senn da «guarnizione»⁸, pia *garnischun* (tud. «Lager»):

Süsura l'g pöevel dals presidis 'salvêt,⁹
Et scodün â chiesa sia turnêt (279-80).

Translaziun: «Sin quei ei la glieud ida naven dallas garnischuns e mintgin ei turnaus a ca-sia».

Alla terminologia politic-administrativa appartegnan era *düchiô* «ducadi, ducat» (10) e *cunto* «contadi» (67).

⁵ La muntada dil verb *apruver* ei problematica en quei liug. Forsa ch'ei retracta era cheu d'in italiano (italian *approvare* «ritenere idoneo, ammettere, accettare»). *DRG* 1:325s. maunca nies citat.

⁶ Cf. BATTAGLIA 1:774 s. *assoldare*: «reclutare soldati dietro pagamento di una mercede, prendere a soldo»

⁷ L'autura da quei artechel para da supponer ch'ei retracti d'ina formaziun indigena, dad ina derivaziun da vegl engiadines *soud*, *sout*. Quei ei buca sclaus, denton pauc probabel en vesta dalla parallela taliana.

⁸ Cf. BATTAGLIA 14:244s. s. *presidio*: «guarnigione militare, truppa di stanza in un luogo».

⁹ Da leger cun ils mss. BC s'alvett.

Al Raig d'Francia in las lias havet prattichio
Da der guerra alg Milanais Düchiô (9–10)¹⁰.

In tel fuorma füt pertz Claven(n)a cun lg cunto (67).

Tenor *DRG* 5:466 s. *duca* I e 4:465 s. *cuntadi* ein *düchio* e *cunto* emprests pli vegls che *düchedi* e *cuntedi*. El cass da *cunto* san ins sedumandar schebein gl'emprest dil talian (da *contado* < latin tard *COMITATU*) seigi la suletta pusseivladad. *COMITATUS* el senn da «circonscription où s'exerce l'autorité d'un comte carolingien» ei fetg derasau el latin medieval¹¹ e sa-vess esser penetrau el romontsch era neu dil nord. Da l'autra vart ein las basas da *duca* e *cunt* evidentamein talianas. Per *cunt* anfl'ins els texts vegls currentamein il germanissem *grof* (*DRG* 7:846s.).

In diever tecnic e special empristau dil talian ei avon maun el verb *largier* v. 429:

Siand las nevs da Com largiedas,
Et infin â Dschen arrivedas, ... (429–30).

Il talian *largare* sa haver la significaziun «allontanare una barca da una ban-china» (diever transitiv) e «allontanarsi dalla costa» (diever intransitiv)¹². Nies citat ei il sulet exempl per quei diever da *largiar* en *DRG* 10:480. Leu anfl'ins la translaziun suandonta: «da die Schiffe von Como ausgelau-fen und bis nach Argegno (?)¹³ gelangt waren».

Immediat suenter ils vers citai va ei vinavon:

Pü barchias lo pareten per mauns,
Plainas da mêl chiatalauns (431–32).

DRG 3:463 s. *chatalaun* translatescha: «dort erschienen noch mehr Schiffe voll von schlimmen Kerlen». *Chatalaun* sco ingiuria ch'ei attestau mo en vegl puter¹⁴ para dad esser importau dall'Italia¹⁵.

¹⁰ Cf. N 4.

¹¹ Cf. NIERMEYER 1976:208.

¹² BATTAGLIA 8:771 culla remarca «marin.».

¹³ Quell'interpretaziun dil num *Dschen* sebasa probabel sin la lecziun dil ms. D: «in-fin'Atschen».

¹⁴ *DRC* s. v. citescha sper nies passadi da Travers aunc in vers dalla *Histoargia dalls trais Iuvans: Wu nauschs, chiatiws chiatalauns* «ihr schlechte, üble Gesellen».

¹⁵ Cf. bergam. *català* «gridatore» (*DRC* loc.cit.). Per la schliata reputaziun dils Catalans cf. era *FEW* 2:488.

Sche Travers scriva:

Et eira tuot lur fantasia,
D'schiatschier tramuntauns our d'Lumbardia (679–80),

sche sesurvesch'el d'in tierm e dad in'optica taliana: *i tramontani* ein quels che stattan da tschella vart dallas muntognas, viu dalla perspectiva dall'Italia¹⁶.

Il giug da plaids che Travers metta en bucca al Medeghin ella scena centrala che descriva l'arrestazion dils ambassadurs grischuns el casti da Müsch era senza dubi tgunsch da capir per lecturs romontschs; la semantica dil verb talian *traversare* renda quei giug denton aunc pli plausibels:

Johan Travers, traversô taunt m hest tü
Ch'eu nun vöelg tü'm traversast plü (473–74).

Per talian, *traversare* (transitiv) significhescha (denter auter) «bloccare una persona; tagliare la strada; frapporsi alla sua avanzata»¹⁷, pia quei che corrispunda al tudestg «in die Quere kommen». Ils vocabularis ladins dattan per quei diever *gnir a la traversa/traviersa*, *gnir per travers/traviers* a qchn., denton buc il verb *traversar*¹⁸.

In cass particular ei il verb *schmunger* duvraus da Travers el senn da «derubar, privar»:

Aquêls fûn dals buns Grischuns assaglieus,
Smungiôs dalla roba, et p(er) terra sternieus (155–56).

Per sursilvan: «Quels vegnevan attaccai dils valerus Grischuns, derubai dalla rauba e fiers giun plaun». Quei diever da *schmunger* ei bein attestaus ellas veglias fontaunas da dretg dall'Engiadinaulta¹⁹. Tier Bifrun anfl'ins il verb *sthmungiêr* mo ina gada:

¹⁶ La translaziun savess esser: «Ei era lur intenziun da scatschar ils tramontans (vul dir ils Grischuns) dalla Lumbardia». Egl artechel *fantaschia* (DRC 6:87–89) maunca nies exempel. Ei fuss stau grev d'integrar el ella structura digl artechel nua che la significaziun ‘neutrala’ («sich kümmern um etwas, im Sinne haben») ei buca zavrada dalla significaziun ‘negativa’ («in Sorge sein, Kummer haben»). – BATTAGLIA 21:54 qualifichescha igl adjектив *tramontano* sco «antico».

¹⁷ BATTAGLIA 21:280,10.

¹⁸ BEZZOLA/TÖNJACIEN, PEER.

¹⁹ Cf. Rq. 4:240 (Romanisches Glossar) *schmunger* «ausscheiden, ausstossen, berauben». Ei vegn indicau ch'il verb corrispunda a *privare* e *exhaeredare* ellias versiuns latinas.

che uus eras ... in aque tijmp sainza Christo, sthmungiôs da la republica da Israelis, & esters dals testamains della promischun (*Eph. 2,12*).

En quei liug ei la muntada «excluder»²⁰. Probablamein ei quei liug staus il pugn da partenza per Oscar Peer che glossescha en siu vocabulari (PEER 1962) il verb *schmuongiar*, *schmunger* sco suonda: «~ a qchn., jem. aus einer Gemeinschaft (z. B. aus der Kirchengemeinschaft) ausstossen, ausschliessen.» Il verb vegn qualificaus sco «v. tr. vulgar». Pertgei vulgar? Quella qualificazion savess ins capir sche *schmunger* fuss in derivat da *muong* cun prefix e suffix (in schinumnau «parasynteticum») sco il talian *smonacare*²¹.

Duri Gaudenz scriva ella poesia *Tschierv scornà*:

Sco quel muong schmuongià chi banduna
per adüna clostr'e clostrigl.²²

Quei ei denton il sulet exempl per quei diever ch'il material dil *DRG* porscha. Sper quel dat ei aunc in'attestaziun per *schmu(o)ngiar* tier Andri Peer che ha, sco ins sa, ina predileczion per arcaissem²³. VELLEMANN 1929 indichescha il verb *schmungiér* «ausstossen» sco antiquaus.

Sche *schmunger* fuss realmein in emprest dil talian *smonacare*, quei ch'ils vers citai da Duri Gaudenz ed il commentari «vulgar» el vocabulari da Peer insinueschan, e sche quella derivonza fuss aunc transparenta, savess ins supponer che la formaziun vegness sentida sco comica. Quei ei denton

²⁰ Glossar GARTNER 1913: «ausscheiden, ausstossen». La Vulgata ha «alienati a conversatione Israel», Erasmus «abalienati à republica Israelis», LUZZI 1943 «esclusi dalla cittadinanza d'Israele».

²¹ «Togliere dallo stato monastico»; rifl. «abbandonare lo stato monastico».

²² GAUDENZ 1980:72.

²³ Ella raccolta da poesias *Clerais* (1963) scriva Andri Peer ella translaziun dalla poesia *Ma vie* da Henri Michaux: «Uschè am schmungiaſt tü» (Michaux: «Tu me désertes ainsi»).

fetg hipotetic; avontut stuess ins anflar parallelas per in diever figurativ da *smonacare* en talian, forsa en dialects settentriunals²⁴.

Autors italianissembs ella *Chianzun da Müs* ein meins problematics. Mintgaton interrumpa Travers la narrazion cun ina remarca auctoriala, in commentari en fuorma da sentenzia:

Da fortüna d'põevel sa guarda scudün
Chi s'inchiappa, ho fat mel ad inminchün (115–16)²⁵.

Il verb *inchapper* (refl. *s'inchapper*) ei in emprest dil talian *incappare* «dar encunter, scarpitschar». El ei attestaus mo el vegl engiadines (puter); era il sursilvan *incapar* culla medema significaziun appartegn mo al lungatg vegl²⁶.

Semeglionts ei il cass digl adjектив *chativ* (E), *caviv* (C, S) < talian *cattivo*. Tenor *DRG* 3:464 ei *chativ* oz strusch pli presents ell'Engiadina. DECURTINS 2001 s. *caviv* indichescha pliras significaziuns, per gronda part modificaziuns semanticas dalla muntada da basa («nausch»)²⁷; quellas ein denton documentadas mo per pintga part egl artechel citau dil *DRG*. Era tier Travers ei la muntada da *chativ* plitost «mal» (tud. «listig») che «nausch» (tud. «böse»):

Et ün chiatif tratto havetne a maun (120).

²⁴ Il problem resta aviarts. Retscheras en dicziunaris dialectals lumbards han purtau negins resultats. Matthias Crünert dil *DRG* suppona che la relaziun da *schmunger* cun tal. *smonacare* sebasa sin in'etimologia sbagliada sugerida da O. Peer e D. Gaudenz. Omisdus auturs che nus havein consultau seregorian buca da quei cass e dian ch'il verb *schmungiar* vegn buca pli duvraus ozildi. Peer seregoria ch'el veva priu si il plaid sin proposta da Andrea Schorta. Probabel che la qualificaziun «vulgar» vegn dad el. – Crünert trai en consideraziun in'influenza dil talian *smungere* ella muntada figurada ‘sfruttare economicamente’. Quei mass a prau cun il diever da *schmunger* ellas fontaunas da dretg. Ei resta denton il problem dalla midada da conjugaziun (3. a 1.), tonpli ch'il romontsch posseda sez il verb eng. *mundscher*, surs. *mulscher* el senn concret «melken» e figurativ «aussaugen, rupfen» («s'appropriar dils raps d'enzatgi»). – Ins savess era patertgar vid lat. EXCOMMUNICARE sco basa etimologica. Semanticamein fuss quei pusseivel: «excluder dalla cumuniona (religiosa, d'artavels, dils beins)», foneticamein eis ei denton problematic. COMMUNICARE dat *chiamüngiar* (cf. *DRG* 3:246, *HR* s. v.).

²⁵ Ils dus vers vegnan citai en *DRG* 8:496 s. *inchappar* e 6:793 s. *furtüna* cun translaziuns differentas. 6:793: «vor der Volkswut hüte sich ein jeder; wer stolpert, hat jedem etwas zuleide getan». 8:496: «vor der (wechselhaften) Kunst des Volkes hüte sich ein jeder; wer sich da verstrickt, hat jedem zuleide getan».

²⁶ Cf. *DRG* 8:496; DECURTINS 2001 s. *incapar*. Denton ei il substantiv *incap* «impediment» fetg currents el sursilvan actual.

²⁷ 1. «böse, bösartig, hinterhältig, heimtückisch». 2. «gewandt, flink». 3. «erfinderisch, kundig, schlitzohrig».

DRG 3:464 translatescha: «und hatten einen listigen Vertrag zur Hand». In ulteriur italianissem tier Travers ei il verb *svalischer*. Sco il talian *svaligiare* significhescha el «rubar, sblundergiar», aschia aunc oz en Engiadina (cf. PEER s. v.). En tschellas regiuns dil grischun maunca el.

... la noua füt gnieu,
Ch'avaunt Pavia s'havess combattieu,
L'g Raig d'Francia cun bgêrs Baruns apigliô,
Et tuot sieu chiamp füs svalischiô (267-70).

In auter italianissem attestaus tier Travers ei *laintamaing* (tal. *lentamente*):

Ls Grischuns d'Travunna aquae sentittan,
Laintamaing incunter, l'g gnitan (537-38)²⁸.

Schebein ch'igl adjectiv *laint* cumpara aunc en certi vocabularis ei sia vitalitat oz pintga, era ell'Engiadin'aulta nua ch'el para dad esser pli derasaus ch'autro²⁹.

La fuorma *pajüra* enstagl digl indigen *temma* ha Travers surpriu medemamein dils vischins dil sid:

Brick per schivir ls Jnimis d'paiüra (219)³⁰.

Fuormas sco *pagüra*, *pagiüra* per il talian standard *paura* ein derasadas els dialects alpin-lombards³¹. Las variantas ch'ein pli datier da quella che Travers drova³² sesanflan en dialects arcaics dil Tessin e dil Grischun talian: *paiüra* a Rossura, Airolo, Valle Maggia, Gresso (Onsernone), *paiéra* a Mesocco (*LSI* 3:685 s. *pagüra*).

Meins evidenta ei la provegnientscha dil talian el cass da *prosmauns* ‘vischins’:

P(er) que ün cusailg dals prosmauns füt clamo (13).

²⁸ *DRC* 10:359 s. *laint* I translatescha: «die Bündner hörten dies von Traona aus und rückten langsam gegen ihn vor».

²⁹ El maunca en PEER. En BEZZOLA/TÖNJACUEN s. *langsam* ei *laint* menzionau suenter *plan*, *plaun*; ils exempels ein denton tuts cun *plan*. *DRC* 10:359 dat duas attestaziuns dialectalas; la gronda part dils exempels ein denton vegls e litterars.

³⁰ Translaziun: «Buca per untigir ils inimitgs per temma».

³¹ Cf. *AIS* 4:725 «la paura».

³² La fuorma *paiüra* sesanfla sulettamein el ms. A. Ms. B *paüra*, C *poeüra*, D *paeüra*.

ULRICH 1882 dat el glossar (p. 240) la translaziun: «nachbar; volksrat verschiedener benachbarter gemeinden». Nies citat anfl'ins duas gadas el *DRG*, sut *cussagl* (3:609) e sut *congregar* (3:78)³³. En omisdus loghens ei la translaziun da *dals prosmauns* «von den Unsrigen».

Igl adjectiv *prusmaunt*, -*ns*, -*nta*, -*tas* «nahe, benachbart» ei attestaus tier Bifrun (CARTNER 1913, Gloss.). PALLIOPPI 1895 dat *prossaint*, -*a* adj. «ganz nahe, nächst, benachbart» e renviescha sin talian *prossimano*. Ellas veglias funtaunas da dretg ladinis anfl'ins medemamein *prosmaunt* adj. «nächst, benachbart, angrenzend» (*Rq. 4:210*, Romanisches Glossar)³⁴.

Ina derivaziun da *PROXIMUS* cul suffix -ANUS ei bein attestada ella Gallo-romania e ell'Italoromania medievala: vegl franzos *proisman*, vegl provenzal *prosman*, vegl talian *proseman*, *prossiman(o)* e.a.v. (FEW 9:489s., MONACI/ARESE 1955:753). Per quei savess *prosmaun* era esser ina formazion indigena.

Sch'ins vul classificar ils exempels d'italianissem (ni italianissem probabels) che nus havein examinau tenor las categorias «appartenenza al lungatg vegl / era al lungatg actual / exclusivamein al lungatg da Travers» constatesch'ins che la gronda part da quels appartegn mo al lungatg vegl ni al diever individual da Travers. Ina tala classificaziun resta denton problematica. Primo eis ei prigulus da sefidar dils vocabularis che cuntegnan savens fuormas che vegnan buca pli duvradas el lungatg modern. Secundo ei la *Chianzun da Müs* la suletta ovra litterara enconuschenta ell'emprema mesadad dil 16^{avel} tschentaner, aschia ch'igl ei nunpusseivel da decider sch'in diever ei individuals da Travers ni generals. Malgrad quellas resalvas empruein nus da classificar nos exempels tenor ils criteris menziunai.

In dils italianissem ella *Chianzun da Müs* sesanfla mo tier Travers: *pajüra* (v. 219; sisura p. 117). In appartegn era al lungatg modern, culla medema significaziun: *svalischer* (v. 270; sisura p. 117). Treis ein era moderns, denton cun ina muntada differenta: *presidi* (v. 279; sisura p. 112), *largier* (v. 429; sisura p. 113) e *chatalaun* (v. 432; sisura p. 113). Dus ein attestai el lungatg modern; lur vitalidad ei denton malsegira: *chativ* (v. 120; sisura p. 116) e *laintamaing* (v. 538; sisura p. 117). La gronda part dils italianissem duvrai da Travers (6) ein mo dil lungatg vegl: *assuder* (v. 185; sisura p. 112), *inchapper* (v. 116; sisura p. 116), *düchiô* (v. 10; sisura p. 113), *cunto* (v. 67; sisura p. 113), *schmunger* (v. 156; sisura p. 114ss.) e *prosmaun* (v. 13; sisura p. 117). Els treis davos exempels eis ei dil reminiscent buca segir ch'ei retracti d'italianissem.

³³ Pervia dil vers suandon: «Et la plü part dals capitaumis lo congregiô».

³⁴ Las fuormas cun -*t*, cunzun *prossaint* (PALLIOPPI) ein forsa duidas ad in'influenza dil suffix *-mant* < -MENTE.

In cass special ei il giug da plaids cun *traverser* (v. 473–74; sisura p. 114). Cheu lubescha la parentella denter talian e romontsch il diever parodistic dil verb ladin.

Igl italianissem *tramuntauns* (v. 680; sisura p. 114) ei buca d'anflar els vocabularis ladins moderns. El stuess denton esser capeivels senza problems. Decurtins 2001 menziuna *tramontan* «jenseits der Berge» (< tal. *tramontano*) per il sursilvan.

Quella bilanza fa patertgar ch'il diember relativamein elevau dils italiannisems tier Travers seigi in reflex dalla situaziun persunala digl autur. Il contact intensiv culla vischinanza taliana ei finalmein era colligiaus cun il cuntegn dall'ovra che raquenta schabetgs dils quals igl autur ei staus in dils protagonists.

Bibliografia

- AIS = K. JABERC/J. JUD: *Sprach- und Sachatlas Italiens und der Südschweiz*, Zofingen 1928–40 (8 vol.)
- BATTAGLIA, S.: *Grande dizionario della lingua italiana*, Torino 1961–2002 (21 vol.)
- BEZZOLA, R.R. 1979: *Litteratura dals rumauntschs e ladins*, Cuira
- BEZZOLA, R.R./TÖNJACHEN, R.O. 1976: *Dicziunari tudais-ch-rumantsch ladin*, Cuoira
- DECURTINS, A. 2001: *Niev vocabulari romontsch sursilvan–tudestg*. Neues rätoromanisches Wörterbuch surselvisch-deutsch, Chur
- DRG = *Dicziunari Rumantsch Grischun*. Ed. Società Retorumantscha, Cuoira 1939ss.
- FEW = W. v. WARTBURG, *Französisches etymologisches Wörterbuch*, Bonn etc. 1928–2002 (25 vol.)
- GARTNER, TH. 1913 (ed.): *Das Neue Testament*. Erste rätoromanische Übersetzung von Jakob Bifrun 1560, Dresden (*Gesellschaft für romanische Literatur* 32)
- GAUDENZ, D. 1980: *I chatscha l'alba*. Poesias, Scuol
- GRÜNERT, M. 2005: «Bündnerromanische Schriftnormen. Volkssprachliche und neolateinische Ausrichtungen in Romanischbünden zwischen der Mitte des 19. Jahrhunderts und den 1930er Jahren», *VRom.* 64:64–93
- HR = RUT BERNARDI et al.: *Handwörterbuch des Rätoromanischen*. Wortschatz aller Schriftsprachen, einschliesslich Rumantsch Grischun, mit Angaben zur Verbreitung und Herkunft (3 Vol.), Zürich 1994.
- LSI = *Lessico dialettale della Svizzera italiana*. Ed. Centro di dialettologia e di etnografia, Bellinzona (5 vol.)
- LUZZI, G. 1943: *La sacra Bibbia ossia l'antico e il nuovo testamento*. Versione riveduta in testo originale dal Dottor Giovanni Luzzi, Roma
- MONACI, E./ARESE, F. 1955: *Crestomazia italiana dei primi secoli*, Roma/Napoli/Città di Castello
- NIERMAYER, J. F. 1976: *Mediae latinitatis lexicon minus*, Leiden
- PALLIOPPI, Z. ed E. 1895: *Dizionario del idioms romantschs d'Engiadina'ota e bassa, della Val Müstair, da Bravuogn e Filisur, cun particulera consideraziun del idiom d'Engiadina'ota*, Samedan

- PEER, A. 1963: *Clerais*. Poesias, Mustér
- PEER, O. 1962: *Dicziunari rumantsch ladin-tudais-ch*, Samedan
- Rq.* = A. SCHORTA/P. LIVER (ed.), *Rechtsquellen des Kantons Graubünden*, Aarau 1980–85 (4 vol.)
- SCHORTA-CANTENBEIN, A. e BERTA 1942 (ed.): «GIAN TRAVERS. *La chianzun dalla guerra dagl Chiaste da Müs*», *ASSR* 56:7–60
- ULRICH, J. 1882 (ed.): *Engadinische Chrestomathie*, Halle
- VELLEMANN, A. 1929: *Dicziunari scurznieu da la lingua ladina*, Samedan
- WIESER, C. 1970: «Johann Travers 1483–1563», in: *Bedeutende Bündner aus fünf Jahrhunderten*. Festgabe der Graubündner Kantonalbank zum Anlass des 100. Jahrestages ihrer Gründung 1870, 1:43–61, Chur³⁵

³⁵ Jeu less engraziar a plir(a)s collegas per discussiuns ed agid: ad Annetta Canzoni, Matthias Grüner, Florentin Lutz, Clà Riatsch e Peter Wunderli, tut specialmein a Matthias Grüner per sias retschercas el material dil *DRC* ed a Florentin Lutz per la correctura linguistica da miu text.